

Siunnersuummut nassuiaatit
Nassuiaatit nalinginnaasut

1. Aallaqqaasiut

Siunnersuummik pingaarnertut siunertaavoq sulinermit ilanngaammik eqqussinissaq. Sulinermit ilanngaat sulinissap kajungernerulersinnissaanut iluaqutaassaaq, inuullu ataasiakkaap sulinermit il.il. isertitai tunngavigalugit naatsorsorneqartassalluni. Ilangaat inuit sulisartut appasissumik aamma akunnattunik isertitaqartut ukiumut 4.100 kr.-t missaata tungaanut aningaasanik atoriaannaasaannik annertusaassaaq.

Ilanggullugu siunnersuummi akileraarutaasussaaajunnaarsinniarneqarput akissarsiat, immikkut misissuinerit ataanni Politiets Efterretningstjenestemit akissarsiaritinneqartut.

2. Siunnersuummi immikkoortut pingaarnertit*Sulinermit ilanngaammik eqqussineq*

Sulinermit ilanngaateqarnikkut innuttaasut sulisartut atugaat pitsanngorsarneqassapput. Ilangaat isumaqassaaq, inuit sulinissamut aningaasaqarnikkut annerusumik kajumissaarneqassasut sulinermillu iluanaaruteqarnerussasut. Siunnersuutittaaq aningaasarsiat aningaasartuutillu katitigaasut nikingassutaasa procentiisa annikinnerinik unammillernartunik, appasissumik akunnattumillu isertitaqartunut unammillernartuusinnaasunik, annikillisaqataassaaq, taamaasillunilu sulilernissamut kajumissusermik annertusaasinnaalluni.

Ilangaat sulinermit il.il. isertitat, inummut ilanngaammik kiisalu nalinginnaasumik ilanngaammik qaangiisut tunngavigalugit naatsorsorneqartassaaq. 2019-imi inummut ilanngaat aamma sulinermit ilanngaat 58.000 kr.-uvoq.


Sulinermit ilanngaat annertusiartortinneqassaaq, taamaasilluni, 180.400 – 350.400 kr.-t akornanni tunngaviusumik isertitaqarnermi ukiumut 9.600 kr.-ussalluni. Sulinermit ilanngaatip inuup akileraareerluni aningaasat atoriaannaasaanik 4.128 kr.-nik annertusaassaaq akileraarut 43 %-iuppat.

Siunnersuutigineqarpoq, sulinermit ilanngaat inunnut appasissumik akunnattumillu isertitalinnut siunnerfilerneqassasoq annikillisaanikkut. Ilangaammik annikillisaanerup, sunnuteqaqataaffigissavaa ilanngaammut aningaasartuutit annikillisarneri. Sulinermit ilanngaat annikillisarneqassaaq tunngaviusumik isertitat ukiumut 350.400 kr.-t sinnerpagit, taamaasilluni 550.000 kr.-nik sinnerlugilluunniit tunngaviusumik isertitaqarnermi 0 kr.-ussalluni.

Siunnersuummik inuit 11.000 missaanniittut qaffasinnerpaamik sulinermit ilanngaammik pisassasut missiliorneqarput. Inuit 16.000-it missaanniittut annikinnerusumik sulinermit ilanngaammik iluaquteqartussatut naatsorsuutigineqarput. Akileraartartut katillugit 38.000-t missaanniipput.

Sulinermit ilanngaat inunnut appassissumik akunnattumillu isertitalinnut siunnerfilerneqarpoq. Isertitaqatigiinni taakkunani nalinginnaasumik, aningaasarsiat aningaasartuutillu katitigaasut nikingassutaasa procentiini annertunerpaamik unammillernartoqarfiupput.

Unammillernartumut pissutaavoq inuup isertitaasa qaffannerani akileraarusiinemik nassataqarnera kiisalu pisortanit ikiorsiissutinik annikilliliineq.



Titartagaq 1: Paasisutissarsiffik Aningaasaqarnermut Naalakkersuisoqarfik

Titartakkami takuneqarsinnaavoq, inoqutigiit marlunnik meerartallit, ukiumut 298.000 kr.-nik inoqutigiullutik isertitaqartut, isertitaat 1 kr.-mik qaffariarpata, innuttaasoq 35 øremik isertitanik atuisinnaanerulissasoq, akileraarut (42 øre) pissutigalugu kiisalu ineqarnermut tapiissutit, meeqqanut ikiorsiissutit aamma ulluunerani paaqqinnittarfimmu tapit annikillissammata (23 øre).

Ikiorsiissutit taaneqartut inoqutigiinni meeqqat amerlassusaat naapertorlugit aalajangersarneqartarmata, pissutaasoq tamanna tunngavigalugu aningaasarsiat aningaasartuutillu katitigaasut nikingassutaasa procentii nikerarput. Nalinginnaasumik unammillernartoq appassissumik akunnattumillu isertitaqartut akornanni annertunerpaasarpoq, pisortat ikiorsiissutaat inoqutigiinni 450.000 kr.-t missaanni qaffasinnerusumillu isertitaqartuni amerlanerpaatigut annikillisarneqartarmata.

Inuit sulinermit ilanngaammut ilaapput:

- Kalaallit Nunaanni tamakkiisumik akileraartussaasut, Kalaallillu Nunaata avataani akileraarutit eqqarsaatigalugit najugaqanngitsut.
- Tamakkiisumik akileraartussaannerup aaqqissuussinerup ataani atorfeqanngitsut.

Tunngaviusumik isertitanut ilaapput inuup aningaasarsiai A-t aamma B-t katillugit. Sulinermut ilanngaati isertitanut, suliffeqarnermut atatillugu isertitaasunut pingaarnertut iluaqutaanissaanik siunertaqarnermut atatillugu, tunngaviusumik isertitani ilaangillat isumaginninnikkut tapiissutit, soorlu pisortat ikiorsiissutaat kiisalu suliffeqanngikkallarnermi ikiorsiissutit. Ilanngullugu soraarnerussutisiat, ass. utoqqalinersiat aamma soraarnerussutisiaqarnissamut aaqqissuussinerit nammineq pigisat tunngaviusumik isertitani ilaangillat.

Sulinermut ilanngaati naatsorsorneqartarpoq tunniunneqartarlunilu pisussaasunut akileraarutitigut paasissutissat, matumani nammineq nalunaarsuineq tunngavigalugit. Ukiumut isertitaqarfiusumut tulliuuttumut sulinermut ilanngaati inaarutaasumik naatsorsuinerup atatillugu naatsorsorneqartarpoq. Sulinermut ilanngaammik tunniussineq akileraarutinik sinneqartoorutinik tunniussinerup atatillugu tunniunneqartarpoq. Ukiumut isertitaqarfiusumut 2020-mut sulinermut ilanngaati assersuutigalugu august 2021-mi tunniunneqassasoq naatsorsuutigineqarpoq.

Siunissaq ungasinnerusoq eqqarsaatigalugu naatsorsuutigineqarpoq, sulinermut ilanngaati qaammatikkaartumik naatsorsorneqarsinnaallunilu ilanngaatigineqartarsinnaassasoq. Tamatumunnga piunnaasaq tamanna sioqqullugu akileraarnerup aaqqissuussinerup IT-kkut aaqqissuussinerup naleqqussaaneq, pitsaanerup siusinaartumik nalunaarsuineq kiisalu aningaasarsiat A-nik tunniussinerup atatillugu sulisitsisut pisussaaffinnik arlaqarnerup tunineqarnissat.

Sulinermut ilanngaati ilanngullugu aningaasarsianit akileraarutit pillugit inatsisartut inatsisaanni kiisalu akileraarutinik aqutsineq pillugu inatsisartut inatsisaanni malittarisassat nalinginnaasut naapertorlugit aalajangersarneqarpoq, ass. akileraarusiinerup aalajangiisartunut naammagittaalliuteqarnerup il.il. atatillugu.

Akissarsiat immikkut misissuinerit ataanni Politiets Efterretningstjenestemit akissarsiaritinneqartut akileraaruteqaataajunnaarnissat

Siunnersuut saqqummiunneqarpoq Politiets Efterretningstjeneste pillugu inatsimmut aaqqiissummik siunnersuummut tusarniaanermik Kalaallit Nunaata tigusaqareernerata kingorna. Aaqqiissutip ilaatigut imaraa nalunaaruteqartunut, paasissutissiisunut il.il. akissarsitsisinnaneq. Akissarsiat taakku suliap qanoq ittuunera naapertorlugu sakkortulluinnartumik isertugaataasariaqarmata, Danmarkimi akileraaruteqaataannginnissat kiisalu isumaginninnikkut ikiorsiissutinik naatsorsuinerup tunngavinnit ilanngunneqannginnissat aalajangerneqarsimavoq. Siunnersuummik matumunnga

siunertarineqarpoq taamatut akissarsiat taakku isertitanik akileraaruteqaataasussanik naatsorsuinermi ilanngunneqartannginnissaat.

Siunnersuutip Politiets Efterretningstjenestip sulinerani isertuussineq atatiinnarlugulu qulakkiissavaa. Siunnersuutigineqarpoq aalajangersakkamik eqqussisoqassasoq, akissarsianik, PET-mit paasisutissiisunut imaluunniit nalunaaruteqartunut ass. akissarsiaritineqartut aamma ajunngitsorsiaritineqartut, isertitat akileraaruteqaataasussaasut naatsorsorneranni ilanngunneqassanngitsut.

Politiets Efterretningstjeneste pillugu inatsimmut aaqqiissummik siunnersuutip atuutilersinneqarnissaanut ataqatigiissarniarlugu, siunnersuutigineqarpoq Naalakkersuisut pisinnaatinneqassasut atuutilerfissaq nalunaarutikkut aalajangersinnaassagaat.

Siunnersuut inatsimmut atuuttumut sanilliullugu	
<i>Oqaasertaa atuuttoq</i>	<i>Siunnersuut</i>
	§ 1 Aningaasarsianit akileraarutit pillugit Inatsisartut inatsisaanni nr. 12, 2. november 2006-imeersumi, ilaatigut Inatsisartut inatsisaanni nr. 2, 26. april 2007-imi, Inatsisartut inatsisaanni nr. 3, 30. november 2009-mi, Inatsisartut inatsisaanni nr. 10, 29. november 2013-imi, Inatsisartut inatsisaanni nr. 7, 6. juni 2016-imi kiisalu kingullermik Inatsisartut inatsisaanni nr. 22, 28. november 2018-imi allanngortinneqartumi tulliuuttut allannguutigineqarput:
	1. § 34, nr. 20-p kingorna nr. 21-tut ilanngunneqarpoq: “21) Akissarsiat, Politiets Efterretningstjenestemut immikkut misissuisarnerup ataani aningaasanit tunniunneqartut.”
	2. § 38-p kingorna ilanngunneqarpoq: ”Kapitali 3 a <i>Sulinermut ilanngaasut”</i>
	3. § 38-p kingorna Kapitali 3 a-tut ilanngunneqarpoq ”§ 38 a. Sulinermut ilanngaasut qinnuteqaateqarnani inunnut imm. 2-mi

pineqartunut tunniunneqartassaaq. Sulinermit ilanngaat kapitalimi matumani malittarisassat naapertorlugit naatsorsorneqartassaaq kiisalu tunniunneqartarluni.

Imm. 2. Inuit tulliuttut sulinermit ilanngaammik pisinnaatitaapput:
1) § 1, imm. 1-2 naapertorlugit akileraartussaasut, kiisalu marloqiusamik akileraartarnermi isumaqatigiisummi aalajangersakkat malillugit naalagaaffimmi allami, Danmarkimi imaluunniit Savalimmiuni najugaqartutut isigineqanngitsut, aamma
2) § 72, a, imm. 1 imaluunniit § 72 b, imm. 1 naapertorlugit tamakkiisumik akileraartinneqanngitsut.

§ 38 b. Sulinermit ilanngaat ukiumut annertussusigissavaa:

1) Tunngaviusumik aningaasarsiani, § 67 naapertorlugu inummut ilanngaammut § 21, imm. 2 naapertorlugu nalinginnaasumik ilanngaat ilanngullugu naapertuuttuni, ukiumut 180.400 kr.-t tungaannut sulinermit ilanngaat ukiumut 0 kr.-mit ukiumut 9.600 kr.-nut narlusuumik annertusiartuaartinneqassaaq.

2) Tunngaviusumik aningaasarsiat ukiumut 180.400 kr.-nit ukiumut 350.000 kr.-uppata, sulinermit ilanngaat ukiumut 9.600 kr.-ussaaq.

3) Tunngaviusumik aningaasarsiat 350.000 kr.-nit 550.000 kr.-uppata, sulinermit ilanngaat ukiumut 9.600 kr.-nit 0 kr.-mut narlusuumik appariartortinneqassaaq.

Imm. 2. Imm. 1-imi akigitat kiisalu aningaasat ukiumut aningaasarsiorfiusumut 2020-mut atuupput. Akigitat il.il. ukiumut 1. januarimi akigititanik naleqqussaanermi procenti naatsorsorneqartoq kingulleq malillugu aalajangersarneqartassapput.

§ 38 c. Sulinermut ilanngaammut tunngaviusumik aningaasarsiat inuup ataatsimut isertitai A-t aamma B-t katillugit, § 41, imm. 2 naapertorlugu, aningaasarsianut akileraarutaasussanut ilanngullugit naatsorsorneqanngitsut annertussusigissavaat.

Imm. 2. Tunngaviusumik aningaasarsianut ilaapput aktiaatinit iluanaarutit Kalaallit Nunaanni ingerlatseqatigiiffinit pissarsiat. Iluanaarutit pissarsiarineqartut iluanaarutitik akileraarusiineq sioqqullugu aningaasanngortinneqartarput.

§ 38 d. Tunngaviusumik aningaasarsiat naatsorsornerini ilanngunneqassanngillat akiliinerit allallu, Soraarnerussutisiaqarnissamut aaqqissuussinermit pinngitsoorani ilaanissaq pillugu Inatsisartut inatsisaanni § 4, imm. 1-2-mi naatsorsorneqarsimasut, kisiannili ilanngunneqassapput aalajangersakkami imm. 1, nr. 1-3-mi naatsorsorneqarsimasut.

Imm. 2. Tunngaviusumik aningaasarsianik naatsorsuinermit aamma ilanngunneqassanngillat isertitat il.il. §§ 70 aamma 71-imi ilanngunneqartut.

Naatsorsuineq akiliinerlu

§ 38 e. Akileraartarnermut ingerlatsiviup 1. septemberiutinnagu tunngaviusumik aningaasarsiat naatsorsortassavai tak. § 38 c-38 d, ukiumi akileraarusiiffiusumi kiisalu sulinermut ilanngaammik naatsorsuisassalluni. Tunngaviusumik aningaasarsiat negativiuppata, sulinermut ilanngaat 0 kr.-ussaaq. Sulinermut ilanngaatip nalinga akilerneqassaaq kiisalu akileraaruserinermik ingerlatsineq pillugu

	<p>inatsisartut inatsisaanni § 25 naapertorlugu akileraarutitut sinneqartoorutaasutut akiliinertut suliarineqartassallutik.</p> <p><i>Imm. 2. Akileraartarnermut ingerlatsiviup ukiumoortumik ukiumi sulinermit ilanngaatip naatsorsornera nassiuttassavaa.”</i></p>
<p>§ 88, imm. 2, oqaaseqatigiit siulliit</p> <p><i>Imm. 2. Iluanaarutininik tunniussinissamik pisassanngortitsinermilluunniit aalajangiinerup, nalunaaqqusinermiluunniit nalunaarnissamut piffissaliunneqartup naanerata ulluata qaammataata tulliani kingusinnerpaamik ullut qulinganni, selskabi Naalakkersuisut aalajangigaannik iluseq atorlugu aalajangiineq pillugu paasissutissanik nalunaaruteqassaaq.</i></p>	<p>4. § 88, imm. 2, oqaaseqatigiit siulliit ima oqaasertaqarput:</p> <p>” Ingerlatseqatigiiffik akiliinissamut imaluunniit pissarsiassanik allannermi imaluunniit Naalakkersuisunit allanneqareersumik piunasaqaateqarnissamut killiliussap qaangiuttup ullup kingorna kingusinnerpaamik qaammatip 10-ani akuersinermut paasissutissat kiisalu tiguisussat nalunaarutigisassavai.”</p>
	<p style="text-align: center;">§ 2</p> <p>Inatsisartut inatsisaat 1. januar 2020 atuutilerpoq, kisiannili tak. imm. 3.</p> <p><i>Imm. 2. Ukiumi isertitaqarfiusumi 2020-mit aallarnerluni sulinermit ilanngaat siullermeerluni naatsorsorneqassaaq § 1, nr. 2-3-mi aalajangersakkat malillugit.</i></p> <p><i>Imm. 3. Naalakkersuisut pisinnaatinneqassapput nalunaarut aqqutigalugu § 1, nr. 1-ip atuutilerfissaatut ullormik aalajangersaassallutik.</i></p>

3. Aningaasaqarnikkut allaffissornikkullu pisortanut kingunerisassat

Sulinermit ilanngaammik eqqussineq

Sulinermit ilanngaatip aningaasaqarnikkut kingunissai:

Ukiumoortumik aningaasaqarnikkut kingunissat AI 2021-mit kingornalu

Sulinermit ilanngaat -107 mio. kr.

Annikillisaaneq 23,5 mio. kr.

Nikerarnermi sunniutinut 38,5-init 33,5-inut mio. kr.

Katillugit -50 –nit 45-nut mio. kr.

Sulinermut ilanngaammik eqqussinermi erngertumik iluanaarutitigut appariaatissaq -107 mio. kr.-t missaanniissasoq naatsorsorneqarpoq. Sulinermut ilanngaammik apparsaaneq 23,5 mio. kr.-t missaannik iluanaarutaassasoq naatsorsuutigineqarpoq, taamaasilluni iluanaarutitigut toqqaannartumik appariarneq katillugu 83,5 mio. kr.-ussaaq.

Nalilerneqarpoq, sulinermut ilanngaammik eqqussinermut atatillugu nikerartumik sunniuteqassasoq. Sunniutit taakku sulinermit sunniutaassasut naatsorsuutigineqarput, tassani innuttaasut sulinerunissaq toqqassagaat, akileraarutitigut isertitat qaffariarnerannik kiisalu pisortat isumaginninnikkut aningaasartuutaasa annikillinerannik kinguneqartumik. Tamatuma saniatigut innuttaasut aningaasat atoriaannaasaasa qaffariarnerat sunniutaassaaq, taamaasilluni atuineq qaffariassalluni. Tamanna ilaatigut nunatta karsianut annertunerusumik iluanaarutaassaaq, assersuutigalugu eqqussinermi akitsuutitigut aamma suliffeqarfiit akileraarutaasa qaffannerisigut il.il. ilaatigut atugassanik niuerfimmit. Ataatsimut isigalugu nikerartumik sunniutit 38,5-33,5 mio. kr.-t missaanni iluanaarutaassasut missiliorneqarpoq. Nikerartumik sunniutissat missingersornerinut atatillugu annertunerusumik qularnartoqarpoq. Assersuutigalugu sulinermit sunniutaasumut apeqqutaapput atorfiit inuttaqanngitsut il.il. ilaatigut taakkununga apeqqutaallutik inuiaqatigiinni pissutsit.

Siunnersuut katillugu 50-45 mio. kr.-t missaanni iluanaarutitigut appariarnermik nassataqassasoq missiliorneqarpoq.

Akileraartarnerup aaqqussuussaanerata ilusilersugaanera naapertorlugu inummut akileraarutinit, kommunit ataatsimut akileraarutaannit kiisalu suliffeqarfiit iluanaarutinillu akileraarutinit isertitat 75 %-iisa missaat ullumikkut kommuninut tuttarput. Nunatta karsiaata taamaasilluni akileraarutinit isertitat 25 %-iisa missaannai tigusarpai.

Siunnersuutip inuup akileraarutaanit iluanaarutit apparnerannik nassataqartussaammat, siunnersuut kommunit akileraarutinit iluanaarutaannut sunniuteqassaaq. Paarlattuanik suliffeqarnermik sunniuummit kommunit aamma isumaginninnikkut ikiorsiissutitigut aningaasartuutikinnerulissapput kiisalu suliffeqarfiit kiisalu iluanaarutinit akileraarutinit isertitaqarnerulissallutik. Tunngavik DUT malillugu kommunit taamaasillutik ataatsimoortumik tapiissutitigut allannguutit ilanngaaseereerluni sunniutaannik taarsiivigineqassapput.

Akileraarutinit aqutsinermut sunniutissat. Naatsorsuutigineqarpoq siunnersuut allaffissornikkut sulisussanik nutaanik 2-nik nutaanik pisariaqalersitsissasoq. Taakku pingaarnertut suliarissavaat sulisitsisunik nakkutilliineq kiisalu innuttaasunit sulisitsisunillu sullissineq aamma saaffiginnissutinit suliaqarneq.

Ataatsimut akissarsianut aamma ingerlatsisunut akiliutissat aningaasartuutaanerusussat ukiumut 1,2 mio. kr.-ussasut missiliorneqarput kiisalu ukiumi siullermi IT-kkut aaqquissutissanik il.il. ineriartortitsinermut ataasiarluni aningaasartuutissat 3-5 mio. kr.-ussasut missiliorneqarlutik.

Akissarsiat immikkut misissuinerit ataanni Politiets Efterretningstjenestemit akissarsiaritinneqartut akileraaruteqaataajunnaarnissaat

Nalilerneqarpoq, siunnersuut aningaasaqarneq eqqarsaatigalugu pisortanut annikinnerusumik sunniuteqassasoq, tassani naatsorsuutigineqarmat inunnt akiliinerit annertussusaat amerlassusaallu killeqassasut. Kisiannili politiit kisimik ilisimassavaat akiliinerit katillugit qanoq annertutigissanersut.

4. Aningaasaqarnikkut allaffissornikkullu inuussutissarsiornermut kingunerisassat

Inuussutissarsiortut killilimmik annertussuseqartumik ukiumoortumik nassuiaatinik nassuiaaffiulluarnerusunik nassiussisarnissamut pisussaaffilerneqassapput. Paasissutissat, akileraaruserinermik ingerlatsiviup tunngaviusumik isertitani isertitat qanoq ittuussusaannik immikkoortitsisinnaanissaanut pingaaruteqarput.

Ilanngullugu suliffeqarfinnut pisussaaffiliisoqassaaq, inuit kikkut iluanaarutininik tunineqassanersut nalunaarusiornissamut. Tamatuma nassataraa Kalaallit Nunaanni suliffeqarfiit allaffissornikkut annertunerusumik suliaasaqalernissaat.

Tamatuma saniatigut naatsorsuutigineqanngilaq siunnersuut inuussutissarsiornermut allaffissornikkut imaluunniit aningaasaqarnikkut allanik annertuunik sunniuteqassasoq.

5. Avatangiisinut, pinngortitamut inuillu peqqissusiannut kingunerisassat

Siunnersuut avatangiisinut, pinngortitamut aamma inuit peqqissusiannut sunniuteqassanngilaq.

6. Innuttaasunut kingunerisassat

Siunnersuutip nassatarissavaa, innuttaasut 58.000 kr.-nit 540.000 kr.-t tungaannut sulinermi isertitaqartut isertitatigut siuariarnissaat.

Tamatuma sumut kommunimut akileraartarneq apeqqutaalluni inuit aningaasat atorsinnaasaat 4.100 kr.-nik annertusissavai.

Akissarsiat immikkut misissuinerit ataanni Politiets Efterretningstjenestemit akissarsiaritinneqartut akileraaruteqaataajunnaarnissaat

Siunnersuutip nassatarissavaa Politiets Efterretningstjenestep suleqatiginerani innuttaasup isertuunneqarnissaa kiisalu suliamut akissarsinissaa.

7. Malunnaatilimmik kingunerisassat allat

Siunnersuut allanik kinguneqassasoq naatsorsuutigineqanngilaq.

8. Oqartussaasunik kattuffinnillu il.il. tusarniaaneq

Siunnersuut piffissami xx. Xxx-imit xx. xxx 2019-imut Namminersorlutik Oqartussani naalackersuisoqarfinni tamani, Sulisitsisuni, SIK-mi aamma NUSUKA-mi kiisalu kommunini tallimani tusarniaassutigineqarpoq.

Siunnersuutittaaq piffissami tassani Naalackersuisut tusarniaanermut isaavianni www.naalackersuisut.gl-imi saqqummiussimaneqarpoq.

Tusarniaanermi killiliussap naanerani tusarniaanermut akissutinik tigusaqartoqarpoq...

Oqaaseqaatit tiguneqartut ataani nalinginnaasumik allanneqarput, Naalackersuisut oqaaseqaataat *kipungasumik* allanneqarlutik.

Aalajangersakkanut ataasiakkaanut nassuiaatit

§ 1-imut

Nr. 1-imut

Aalajangersakkap nassataraa, akissarsiat, Politiets Efterretningstjenestemi immikkut misissuinerup ataani akissarsiaritinneqartut, maannakkorpiaq akissarsiatut naatsorsuutini ilaasanninnissai.

Aalajangersakkamik siunertaavoq, Politiets Efterretningstjenestep nunami isumannaatsuunissamut il.il. inuit tapeeqataasut ajunngitsorsiaqartissinnaagaat kinaassusaat imaluunniit attuumassuteqarnerisa imarisaat saqqummiutinngikkaluarlugu.

Nr. 2-mut

Siunnersuutigineqarpoq, sulinermut ilanngaammut malittarisassanik imaqartoq kapitali 3 a nutaaq ilanngunneqassasoq.

Nr. 3-mut

§ 38 a-mut

§ 38 a-tut siunnersuutigineqartoq, inuit sulinermut ilanngaammik piginnaatinneqarneranik piumasaqaatinik aalajangersaavoq.

Imm. 2-mut

Aalajangersakkami nr. 1-2-mi piumasaqaatit tamarmik naammassineqarsimasariaqarput inuup sulinermut ilanngaammik pisinnaanissaanut.

Aalajangersakkami nr. 1-imi aalajangersarneqarpoq, aaqqiissummi pineqartut tassaasut inuit, Kalaallit Nunaanni tamakkiisumik akileraartussaataasut, kiisalu marloqiusamik akileraartarneq pillugu isumaqatigiissut naapertorlugu akileraartarnikkut Kalaallit Nunaata avataani najugaqanngitsut.

Tungaviuvoq, sulinermut ilanngaatisinissap inuup Kalaallit Nunaanni tamakkiisumik akileraartussaataaassasoq, kiisalu assersuutigalugu marloqiusamik najugaqartoqarnerani, inuk akileraartarnikkut isigalugu Kalaallit Nunaanni najugaqartutut isigineqassasoq. Taamaattoqanngippat, inuk siunnersuummut ilaangilaq.

Akileraartussaataaneq ukiup isertitaqarfiusup ilaannaani atuuppat, akileraartussaataasooq sulinermut ilanngaatip ilaannaanik pisinnaassaaq § 12, imm. 1-imi malittarisassaata naapertorlugit.

Aalajangersakkami nr. 2-mi aalajangersarneqarpoq, inuit tamakkiisumik akileraartussaannermi aaqqiissummi ilaasut, sulinermut ilanngaammik pisinnaanngitsut. Tamatumani pineqarput

inuit avataaneersut, assersuutigalugu namminersorlutik oqartussat mittarfinnik suliniutaanni suliaqartut.

§ 38 b-mut

Aalajangersakkami nr. 1-3-p imarai akit siunnersuutigineqartut aamma sulinermut ilanngaammi aningaasat killigitinneqartut.

Imm. 2-mut

Siunnersuutigineqarpoq, akit aamma aningaasat killigitinneqartut akinik nalimmassaanermi procenti naapertorlugu ukiumoortumik iluarsineqartassasut. Akinik nalimmassaanermi procenti ukiut tamaasa aggustip qaammataani nalunaarutigineqartarpoq. Akinik nalimmassaanermi procenti kingulleq atorneqartassaaq.

§ 38 c-mut

§ 38 c aamma § 38 d siunnersuutigineqartut sulinermut ilanngaammut tunngaviusumik isertitaasunik killilersuipput.

Tunngaviusumik isertitat Soraarnerussutisiaqalernissamut aaqqissuussamut pinngitsoorani ilaanissaq pillugu Inatsisartut inatsisaanni ileqqaakkat tunngavii aallaavigalugit aalajangersarneqarput. Tunngaviusumilli isertitat taakku marluk akornanni nikinganerit, Inatsisartut inatsisaasa taakku marluk siunertaasa assigiinngitsut pissutigaat.

Isertitat A-t aamma B-t akileraarutaasussaasut aallaavigineqassapput. Tamatuma imaraa Isertitat-A-ni tamakkiisumik isertitat, tassani pineqartup ilanngaatai, ass. ernianut aningaasartuutit isigineqanngimmata. Isertitat-B-ni ilanngaaseereerluni isertitat ilanngunneqassapput, t.i. ingerlatsinermut aningaasartuutit il.il. ilanngaatai ilanngullugit aningaasarsianit akileraarutit pillugit Inatsisartut inatsisaanni malittarisassat tunngaviillu nalinginnaasut naapertorlugit, ass. amigartoornerit ilanngullugit naatsorsuunneqarnissaannut killiliinernut atatillugu.

Siunnersuutigineqarpoq, tunngaviusumik isertitat naatsorsorneqarnerini soraarnerussutisiaqalernissamut akiliinernik allamut naatsorsuisoqartassasoq, aningaasanik akileraarutaareersunik, akileraannginnermi aningaasanut, taamaasilluni allamut naatsorsuinerit, sulinermut ilanngaatip naatsorsorneqarnerani tunngaviusassallutik. Tamatuminnga siunertarineqarpoq qulakkeerneqassasoq, tunngaviusumik isertitat assigiiaassasut soraarnerussutisiaqalernissamut aaqqiissummut, akiliinermi ilanngaateqarfiusumut kiisalu akileraartussaaffiunngitsumut imaluunniit aaqqiissummut akiliinermi ilanngaateqarfiunngitsumut aamma akileraartussaaffiusumut akiliineq apeqqaatinnagu.

Naatsorsueqqinneq najoqqutassiaq imaattoq naapertorlugu pisassaaq: Aningaasat akiliutit trækprocentip kiisalu 100 procentip assigiinngissutaannik agguarlugu.

Akissarsisartut kiisalu namminersorlutik inuussutissarsiummik ingerlatsisut erninermi sulinnigiffeqarnermi ullormusiaat, naartunermi, erninermi meeravissiarthaarnermilu sulinnigiffeqartarneq ullormusiaqartarnerlu pillugit Inatsisartut inatsisaat naapertorlugu erninermi sulinnigiffeqarnermi il.il. tigusagaat tunngaviusumik isertitanut ilaapput.

Imm. 2-mut

Siunnersuutigineqarpoq, Kalaallit Nunaanni suliffeqarfinit iluanaarutinit isertitat tunngaviusumik isertitatut naatsorsorneqartassasut. Aalajangersakkap ilaatigut qulakkiissavaa tunngaviusumik isertitat assigiissaartumik ajornanngitsumillu naatsorsorneqartarnissaat, tassani assersuutigalugu suliffeqarfinni nunani allaneersunit iluanaarutit kiisalu ernianit isertitat aalajangersakkami imm. 1 naapertorlugu tunngaviusumik isertitanut ilaammata. Aalajangersakkattaaq isertitat suliffeqarfimmit akissarsiatut iluanaarutitullu qanoq tiguneqarsinnaanerinik aningaasannanniarsinnaanermut aarlerinaammik pinngitsoortitsissaaq.

§ 38 d-mut

Aalajangersakkanik aalajangersarneqarpoq, isertitat assigiinngitsut ilaat, aningaasarsiat tunngavigisatut taaneqarsinnaagaluartut isertitanut tunngaviusuni ilaanngitsut. Tamatumani pineqarput isertitat, soraarnerussutisiaqalernissamut aqqissuussinermut pinngitsoorani ilaanissaq pillugu Inatsisartut inatsisaanni § 4, imm. 1-2-mi aalajangersarneqartut. Tamatumani pineqarput soraarnerussutisiat, matuma ataani atorfilittatut, suliffeqarfimmit, siusinaarluni soraarnerussutisiat aamma utoqqalinersiat, isumaginninnikkut ikiorsiissutit arlallit, matuma ataani ilaatigut ineqarnermut tapiissutit, meeqqanut tapiissutit, ilinniagaqarnerisiat aamma meeqqanut ikiorsiissutit. Kisiannili inatsisit § 4, imm. 1, nr. 1-3-mi taaneqartut naapertorlugit isertitat tunniunneqartartut tunngaviusumik isertitanut ilaapput. Matumani pineqarput namminersorlutik oqartussani aamma kommunini il.il. atorfilittanut akissarisaritit akissarsiaat.

Imm. 2-mut

Aalajangersakkamik isertitat ilaat tunngaviusumik isertitanut ilaatinneqanngillat.

Aalajangersakkamik aalajangersarneqarpoq, tunngaviusumik isertitanut ilaanngitsut isertitat §§ 70 aamma 71-imi ilaasut. Tamatumani assersuutigalugu ilaapput umiarsuarni sulinermi akissarsiat akileraartarnermik ingerlatsivimmi ilanngaaseereerluni akissarsiat nalunaarsuivianni ilaasut, tigusisumut akileraarutaasusaanngitsut.

§ 38 e-mut

Aalajangersakkani aalajangersarneqarpoq sulinermit ilanngaatiq naatsorsorneranut tunniunneranullu malittarisassat. Sulinermit ilanngaatiq naatsorsorneqartarpoq inaarutaasumik naatsorsuinermit atatillugu kiisalu akileraarutinit sinneqartoorutaasut tunniunneqarneranut atatillugu tunniunneqartarluni.

Akileraartarnermik ingerlatsiviup periarfissaraa sulinermit ilanngaatip nalinga allatut naatsorsorsinnaassallugu, soorlu tamanna akileraarutitut sinneqartoorutaasunut atuuttoq.

Imm. 2-mut

Siunnersuutigineqarpoq, akileraartarnermit ingerlatsivik ukiumoortumik innuttaasumut naatsorsuutit nassiussisassasoq, tassani takutinneqassaaq tunngaviusumik isertitat, sulinermit ilanngaatip naatsorsornerani aamma sulinermit ilanngaammik naatsorsuinermi.

Nr. 4-mut

§ 88, imm. 2-mik allangortitsinermi siunnersuutigineqarpoq, suliffeqarfiit pisussaaffilerneqassasut nalunaarutigissallugu, iluanaarutit kikkut tiguisuunersut. Suliffeqarfiit akileraartarnermit ingerlatsivinnut tamanna nalunaarutigisassavaat, iluanaarutit akileraarutaasussanik uninngatitsinermit nalunaaruteqarnermit atatillugu.

Akileraartarnermit ingerlatsivik qanimut aalajangersakkanik aalajangersaassaaq nalunaarut qanoq isikkoqarluni tunniunneqartassanersoq.

§ 2-mut

Inatsisartut inatsisaat ulloq 1. januar 2020-mi atuutilersinneqassasoq siunnersuutigineqarpoq.

Imm. 2-mut

Siunnersuutigineqarpoq sulinermit ilanngaat ukioq isertitaqarfusoq 2020-mit eqqunneqassasoq.

Imm. 3-mut

Siunnersuutigineqarpoq, Naalakkersuisut piginnaatinneqassasut akissarsiat immikkut misissuinerit ataanni Politiets Efterretningstjenestemit akissarsiaritinneqartut akileraaruteqaataajunnaarnissaat pillugu aalajangersakkap ulloq atuutilerfissaa nalunaarutikkut aalajangersarsinnaassagaat. Tamatumangga qulakkeerneqassaaq Politiets Efterretningstjeneste pillugu inatsimmut aaqiissutit atuutilerpat aalajangersagaq atuutilissasoq.